

RESOLUCIÓN POLA QUE SE MODIFICA O PERÍODO PARA A COLOCACIÓN DE CORDAS COLECTORAS DE SEMENTE DO MEXILLÓN NA CAMPAÑA DO ANO 2024 NO ÁMBITO DE COMPETENCIA DA XEFATURA TERRITORIAL DA CONSELLERÍA DO MAR EN VIGO.

ANTECEDENTES

1. O día 8 de febreiro do 2024, a Federación de Asociacións de Mexilloeiros (FEMEX) solicita autorización para adiantar o período de colocación de cordas colectoras ao 20 de febreiro e a ampliación do número de cordas colectoras a 150 unidades por batea e cunha lonxitude de 12 metros.
2. O día 9 de febreiro do 2024, a Asociación de Productores Mejilloneros Ria Nosa de Moaña solicita a autorización para a colocación de 100 cordas colectoras máis por batea en todos os polígonos de cultivo de Galicia entre o 1 de marzo e o 30 de setembro de 2024 e que a lonxitude de ditas cordas sexa de 12 metros.
3. O 13 de febreiro do 2024, solicitase un informe aos membros da Comisión do Mexillón. Estes informan favorablemente e formúlanlle, nalgúns casos, as respectivas peticións individuais ás seguintes entidades: Sociedade Cooperativa de Mexilloeiros de Galicia Socomgal, Asociación de Mejilloneros "San Saturnino", Asociación de Mejilloneros Profesionales A' Marxa, Amegrove Soc. Cooperativa Galega, Asmecruz Sociedad Cooperativa Gallega e Organización de Productores de Mejillón de Galicia "Opmega".
4. O 27 de febreiro de 2024 a Dirección xeral de Pesca, Acuicultura e Innovación Tecnolóxica emite un informe no que indica que non observa ningún inconveniente en que se concedan con carácter excepcional as pretensións mencionadas.

CONSIDERACIÓNIS LEGAIS E TÉCNICAS

1. O artigo 36 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, dispón:
"1. Poderán colocarse cordas colectoras de semente do mexillón siempre que o número total de cordas da batea non sobrepase a densidade e número máximo a que se refire o artigo anterior.



2. Independentemente do recollido no punto anterior, no período que vai dende o 1 de abril ata o 30 de setembro, autorizase a colocación de cordas colectoras de semente do mexillón en bateas de modo que o seu número non sobrepase as 100 respecto ao máximo que lle corresponde á dita batea.

Cando fenómenos medioambientais excepcionais alteren o ciclo normal de reproducción da especie, modificándose a época de fixación larvaria, a delegación territorial (agora xefatura territorial), dentro do ámbito da súa competencia poderá variar o **dito período, previa petición da maioría de entidades representativas do sector e informe da correspondente unidade técnica administrativa.**

En todo caso, unha vez finalizado o período, o número de cordas axustarase ao que corresponda á batea.

3. As cordas colectoras, que terán libre un dos seus extremos, non poderán ter máis de cinco metros de lonxitude contados a partir da superficie do mar. Cada unha delas deberá estar claramente identificada mediante unha marca de color roxo intenso, na súa parte superior, dunha lonxitude mínima de 30 cm que a diferencia perfectamente das cordas de engorde."

2. O día do 27 de febreiro do 2024, o director xeral de Pesca, Acuicultura e Innovación Tecnolóxica emite un informe respecto das solicitudes antes relacionadas, no que consta:

"O cambio climático, xunto cos cambios nas demandas de mexillón de talla máis pequeno para o consumo en fresco, motivan que se modifiquen as condicións establecidas no artigo 36.2 do Decreto 406/1996, do 7 de novembro, polo que se aproba o Regulamento de viveiros de cultivos mariños nas augas de Galicia, no que respecta a colocación de 100 cordas colectoras a maiores das 500 autorizadas, entre o 1 de abril e o 30 de setembro.

As alteracións motivadas polo cambio climático nas condicións oceanográficas e ambientais provocan que cada vez sexan más frecuentes os desprendementos de mexillón e a escaseza de mexilla nas rochas na época hábil de recollida. Ademais, a dependencia dos factores climatolóxicos nos desoves do mexillón así como a limitación das zonas para a extracción de semente de mexillón en banco natural, levan consigo ter en consideración a petición do sector, no que respecta á ampliación do prazo para a colocación de cordas colectoras e a modificación do seu número.

Así mesmo, a maior necesidade de semente debido a cambios nas demandas de mexillón de talla máis pequeno para o consumo en fresco, favorecen a necesidade de buscar alternativas para que os bateeiros se poidan abastecer de semente de mexillón, para complementar á recollida en rocha e evitar unha dependencia desta.

Neste senso, os informes de recontos larvarios feitos en colaboración co laboratorio de inmunoloxía (CINBIO) da Universidade de Vigo (UVIGO) e o Centro de Investigacións mariñas (CIMA) - http://www.intecmar.gal/informacion/fito/informes/I_Larvas2.aspx -, amosan que, nas últimas semanas, se está a producir un incremento das larvas umbonadas. Esta situación aconsella a colocación anticipada das cordas colectoras para aproveitar os previsibles picos de fixación, así como o emprego de cordas colectoras de maior lonxitude durante o proceso



reprodutivo dos exemplares adultos."

3. De acordo co artigo 36.2 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, a competencia para ditar esta resolución correspónدلle á xefa territorial da Consellería do Mar en Vigo.

De acordo con todo o indicado, **RESOLVO**:

Modificar o período polo que se autoriza a colocación de cordas colectoras de semente do mexillón en bateas, establecido no artigo 36.2 do Decreto 406/1996, do 7 de novembro, de forma que, no ámbito de competencia territorial desta xefatura, podéndose colocar dende o 1 de marzo ata o 30 de setembro do 2024.

Esta modificación queda suxeita ás seguintes condicións:

Primeira. As persoas concesionarias deberán comunicalo, con antelación suficiente, indicando o nome do viveiro e a súa localización á Subdirección Xeral de Acuicultura da Dirección Xeral de Pesca, Acuicultura e Innovación Tecnolóxica da Consellería do Mar. A comunicación poderá realizarse a través do modelo PR004 ou do correo electrónico servizo.innovacion.acuicultura.cmrm@xunta.gal.

Segunda. As persoas concesionarias deben realizar a declaración de captación de semente de mexillón a través da aplicación informática de expedición de documentos establecida pola administración. A esta aplicación telemática poderase acceder dende diferentes dispositivos, tanto dende a ferramenta web, dende o TICPESC ou dende o móvil (aplicación MOVTIC).

Os concesionarios deberán de comunicar os datos do viveiro, a súa localización, a data de colocación das cordas, o número de colectores totais no viveiro, a cantidade de mexilla recollida por cada corda colectora, o tamaño medio e o viveiro de destino de dita mexilla.



En todo caso, para os efectos de obtención de información e seguimento técnico destas melloras na captación de mexilla polos técnicos da Consellería do Mar, os titulares dos vixeiros deben colaborar co persoal desta consellería no momento no que lles sexa requirida.

Contra a presente resolución, que non pon fin á vía administrativa, as persoas interesadas poderán interpoñer recurso de alzada ante a persoa titular da Consellería do Mar, no prazo dun mes contado a partir do día seguinte ao da súa notificación, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das Administracións Públicas.

A xefa territorial

Por suplencia (Resolución do 27/12/2023)

A xefa do Servizo de Pesca, Acuicultura e Innovación tecnolólica

Carmen de Benito Caula

